

**Nunarput tamakkerlugu utoqqaat illuinut / utoqqaat najugaannut tunngatillugu pilersaarusiortoqartarnissaa pillugu apeqquteqaat aallaavigalugu oqallisissiasatut siunnersuut.**

(Inatsisartunut ilaasortaq Hans Enoksen, Partii Naleraq)

**Akissuteqaat**

(Ilaqutariinnermut, Naligiissitaanermut Isumaginninnermullu Naalackersuisoq)

Apeqquteqaat aallaavigalugu matumunnga oqallisissiasatut siunnersuummut siunnersuuteqartoq qujaffigerusuppara, tassalu kommunit suleqatigalugit ilaatigut utoqqaat illuinik sanaartornissap pilersaarusiorneqarnera aallartinneqassasoq. Eqqarsaat tamanna Naalackersuisut sanaartornissanut pilersaarutitik aallartitsinerannut tapersersuivoq. Immikkoortortat kommunillu akimorlugit susassa qarfiit immikkoortualuisa ersarissarneqarnissaat oqallisigineqarnissaallu matumani pingaartinneqarpoq.

Nuna tamakkerlugu pilersaarusiami apeqquteqartup taasaani utoqqaat najugassaannik pisariaqartitsinerat nassuiarneqarpoq. Immikkoortortat akimorlugit qiviassagaanni malunnarpoq utoqqaat illuini inissanik pisariaqartitsineq sapinngisamik angerlarsimaffimmiiginnarnissamut tapersersuisoqarnissaanut kommunip qanoq neqerooruteqarsinnaaneranut attuumassuteqartoq. Amerlasoorpassuartigut angerlarsimaffimmi ikiorteqarneruneq kommunimut akikinnerusussaavoq, pingaartumillu utoqqarnut iluaqutaanerusussaalluni utoqqaat illuini inissanik amerlanernik pilersitsinermit. Pilersaarusiortoqarnissaa pisariaqartinneqarpoq, tamatumani utoqqarnut inissiat utoqqaat illuisa qanittuinut inissinneqarsinnaallutik, taamaaliornikkut utoqqaat illuat utoqqarnut utoqqaat illuisa qanittuanni najugaartunut ulluunerani ornittakkatut atorneqarsinnaassamat. Tamatuma saniatigut eqaannerusumik sanaartortoqarsinnaanera, sunut tamanut atorneqarsinnaasunik sanaartortoqarsinnaanera, pisariaqartinneqarpoq, tamatumani assersuutigalugu sanaartortitsineranut aningaasartuutit annertunerit akuerineqarlutik, tamatumunngalu taarsiullugu assersuutigalugu ilinniartut ineqarfiisut, utoqqaat inissiaattut innarluutilillu najugaattut atorneqarsinnaasunik sanaartortitsilluni.

Soorlu siunnersuuteqartup siunnersuummini oqaatigereeraa Kalaallit Nunaanni nuannersumik utoqqalinissaq pingaartuuvoq.

Amerlanernit ilisimaqarpoq ukiuni qulikkaani tulliuttuni utoqqartagut malunnaatilimmik amerleriartortussaasut. Taamatut amerliartortoqarnissaa tunngavigalugu atugarissaarnikkut aaqqissuussinermi unammilligassatut qaangigassat amerliartuinnarput.

Unammilligassat taaneqartut nunamut agguataarneqaannarnatik aaqqissuussaannermut aamma tunngassuteqarput. Taamaattumik utoqqarnut tunngasutigut nutaamik eqqarsariaaseqarnissaq pisariaqarpoq, tassani kommunit tamatumuuna pisariaqartitaat annerusumik nuna tamakkerlugu pilersaarusiornermut ilaatinneqartalerlutik.

Utoqqarnut tunngasut kommuninit oqartussaaffigineqarnerisa eqqummaariffiginissaat pingaartuuvoq, tamatumani utoqqarnut paaqqinniffiliornerni Naalackersuisunit 50 %-imik tapiissuteqarfigineqarsinnaasunik. Tassunga atatillugu utoqqarnut tunngasutigut

iliuuserisassatut periarfissaasinnaasunik Naalakkersuisoqarfik kommunillu suleqatigiillutik sanaartornerup iluani misissuipput.

Naalakkersuisut sulinerannut atatillugu paasinarsivoq utoqqartatta amerlanerpaartaat nunanut sanilerisatsinnut nalinginnaasumik assersuuttakkatsinnut sanilliullugu utoqqaat illuini najugaqartartut. Nunat tamakku tamatumunnga inuiaqatigiittut aningaasartuutaasartut pissutigalugit utoqqaat illuinut ikinnerusunik inissiisoqartarnissaa toqqarsimavaat. Taamaammat susassaqarfimmi tassani assinganik ingerlatsisoqalernissaa tuaviuuttariaqarparput. Tamanna aamma utoqqaat illuini inissanik atuisoqarnissaanut atuuppoq, tassami inissiat ilaat innuttaasuniit innarluuteqartunit 65-it ataallugit ukioqartunit atorneqartarmata, tamakkulu immikkut ittumik ikiorneqarnissamik pisariaqartitsisuupput.

Tamatumani utoqqarnut innarluutilinnullu tunngatillugu allatut inissaqartitseriaatsinik kommunit annerusumik atuinissaat siunnersuutigineqarsinnaavoq. Tamatumani tassaa sinnaapput utoqqarnut ataatsimut najugaqarfiit, inissiat utoqqarnut innarluutilinnullu tulluussakkat. Utoqqarnut tunngasuni eqaannerusumik ingerlatsinikkut angerlarsimaffimmilu ikiorteqartitsinermut aningaasaliinerunikkut innuttaasut namminneq angerlarsimaffimminni sivisuumik, inuunerminnillu aallussaqaqluurlutik nammineerlutik inuusinnaanissaat periarfissinneqassaaq. Nalunngilarput innuttaasut maani nunatsinni taamatut periarfissaqartitaasinnaanissartik kissaatigigaat. Kingullertut periarfissaasinnaasut nutaat tamakku innuttaasunut iluaqutaalersussaapput, tamatumunngalu peqatigitillugu inuiaqatigiinnut aamma akikinnerussallutik.

Kommuninut qanimut oqaloqateqartarnissaaq, apeqqutinullu attuumassuteqartunut nunatsinni utoqqaat peqatigiiffiisa ingerlaavartumik ilannguttarnissat Naalakkersuisunit utoqqarnut sullissisoqarnerani pingaartinneqarpoq. Taamaattumik siunnersuutigineqartut periarfissaasinnaasullu siuliani taaneqartut peqataasut marluk suleqatigalugit misissorneqassapput.

Qanorluunniit pisoqassagaluarpat massakkut periuuserineqartumut nalilersuinissatsinnut, unammillersinnaanissatsinnut, annerusumillu piumasaqarnissatsinnut sapiisertariaqarpugut. Taamaaliunngikkuttami utoqqartatsinnut assigiinngitsunik pisariaqartitalinnut kiisalu puigortunngortunut tunngatillugu siunissamat aningaasaliissutissagut pitsaannerusumik pilersaarusiorsinnaassanngilagut ataqatigiissarluarsinnaanagillu.

Taamatut oqaaseqarlunga oqallilluarnissassinnik kissaappassi.